

第九冊

河水四 道光二十三年至咸豐十一年

再續行水金鑑

丹德署纂


981.026
1377
P

再續行水金鑑卷第八十五

河水編年三十二

道光二十三年正月庚戌（初七日）命刑部右侍郎成剛順天府尹李德馳往江南會同河道總督潘

錫恩督辦大工清宣宗實錄

是日命兩江總督耆英爲欽差大臣馳往廣東查辦事件以福州將軍璧昌署兩江總督未到任前以

江蘇巡撫孫善寶護理清宣宗實錄

是月庚申（十七日）諭據成剛等奏會勘挑工情形一摺現在挑河計長三萬二千餘丈經該侍郎等

分段派員承辦查催約計三月二十後子河可以全竣所有清口以下長河四月底亦可挑竣惟挑工

淺深難易不同自宜酌量增減着照所議確覈辦理總須於原請二百八十餘萬帑項外不至再有加

添而於原估應挑之河一律通暢方爲不負委任其攔黃攔湖各壩並防風護埽各工應辦事宜卽着

該河督飭估發辦又另片奏擬由桃南廳夫工接至攔河壩上就現辦一律興挑俾河水更資暢洩其

夫工以上擬歸入迤上引河頭工內於八九月相機搶挑等語亦着照議妥辦清宣宗實錄

是月癸酉（三十日）諭慧成奏料塼被燒請將應營分別撤任摘頂勒限賠補一摺河南黃沁廳同知

張士鈺黃沁協備王才於該廳緊要工料並不小心防範以致焚燒實屬玩忽張士鈺着卽撤任王才

着摘去頂帶勒限十五日將所燒料塼賠貼足額報明查驗如逾限不完卽着嚴參並究明起火根由

獲犯懲辦 清宣宗實錄

四月戊戌（二十五日）諭軍機大臣等成剛等奏子河挑竣接辦展寬並續估增挑工段情形一摺挑工丈尺自應酌量情形確覈辦理據稱子河業已一律全竣現將展寬工程逐段覆估並將桃南廳夫工接至欄河壩挑工一併估計實共長一萬零九十餘丈比原估有增而銀數較原估轉有撙節卽照所議辦理着該侍郎等嚴飭趕辦仍認真督催如有偷減弊混立即嚴參其挑竣後如不能一律通暢以致臨事復有棘手惟該侍郎等是問所有多餘銀六萬七千二百餘兩着准其存爲將來各工之用其夫工以上既難酌減所有原奏搶辦引河頭及撈淺抽溝之二十萬兩自應存留俟興辦時再行體察情形具奏請旨將此諭令知之 清宣宗實錄

五月丙辰（十四日）諭軍機大臣等成剛等奏夫工以下挑河全竣一摺據奏挑工四萬一百九十餘丈均已報竣覆驗如式起除界壩試放積水一律通暢等語覽奏已悉此次所放積水是否卽係啓放禦黃壩清水能否暢注俾河道刷深現在重運經臨大工且難興築能否於重運過竣回空未到以前趕辦合龍抑必待霜清水落回空歸次以後方行堵築合龍着潘錫恩體察情形具奏成剛李德卽着回京覆命一切應辦事宜交潘錫恩相機妥辦將此諭令知之 清宣宗實錄

六月乙酉（十三日）諭軍機大臣等潘錫恩奏籌議蕭工漫口應俟霜後興築一摺現交伏汛水勢洶激難以進占兼之新料登場總在白晝以後屆時方能採辦着照所請准其於七八月間先購料物一面挑挖夫工以上引河興築壩基俟回空軍船過竣再行擇日進占所有應用物料務期次第預籌購

買勿致臨時短缺貽誤要工是爲至要將此諭令知之 清宣宗實錄

是月庚寅（十七日）命協辦大學士工部尙書敬徵戶部右侍郎何汝霖馳往南河覆看挑挖引河並

大工合龍事宜 清宣宗實錄

七月初一日河東河道總督慧成奏爲入伏前後河水接續盛漲兩岸險工迭生據報中河廳九堡無工之處隄南過水發溜南趨恭摺馳奏事竊照運河船行水勢情形並赴豫防汛緣由臣於六月十五日具奏後次日卽由濟起程途次續據陝州呈報萬錦灘黃河於六月二十一日已時長水五尺五寸黃沁廳呈報武陟沁河於初八初九並初十日已申亥三時及二十日寅午亥三時二十一日午酉兩時十次共長水一丈五尺三寸當二十一日沁黃並漲之時加以入伏後無日不雨衆水匯注以致各廳積存長水大於上數年兩岸普律漫灘汪洋無際臨黃輒石埽壩紛紛報塌均批令該管道督飭妥慎搶辦臣上隄後先至江南交界查勘折回適糧河曹河二廳各工同時着險當卽就近竭力督辦次第穩定隨渡河而南行抵歸河廳工次接據中河廳稟報中牟下汛八堡工程異常危險緣該處於嘉慶二十五年曾出大險廂埽二十一段至道光二年淤閉迄今二十餘載不獨埽壩久經淤沒無存而灘壓墊高已非從前情形可比本年入伏前後該工對岸忽生灘嘴挺峙河心逼溜南趨陡及隄壩當經開歸道福敏馳往督廂埽工二十餘段藉資抵禦不料六月二十一日沁黃盛漲大溜湧注新埽先後全行墊塌趕卽集料搶補甫廂出水溜忽下卸至九堡無工之處偏值二十六日大雨一晝夜二十七日黎明繼以東北風大作鼓溜南擊浪高隄頂數尺兵夫不能立足有力難施九堡隄身頓時過水

全溜奪入南趨口門當即塌寬一百餘丈等情臣聞信之餘心膽俱裂遠在下游相距三百里外冒雨連夜馳赴該工業已無及伏念臣蒙聖主特達之知畀以全河重任方在竭盡血誠希即瀾安工穩稍答高深孰意福薄災生到任甫及八月遇此意外之事寸衷愧恨無地自容惟有仰求皇上將臣從重治罪所有該工現在情形因溜仍南向口門尚在續塌臣即駐工籌辦盤做裏頭事宜不敢懈怠至此次失事係在日間附近居民得以先時遷避是以被難者尙不甚多而民舍田廬不無受淹已由撫臣督飭藩司委員攜帶餅錢文妥爲撫卹其口門溜勢係由東南下注至水由何處州縣行走並經撫臣委員確查另行具奏再查此番豫省上游既有漫口則江南桃北口門當必斷流堵合之費自可較省而臣所轄境內又有此意外疏虞致煩宵旰勞實屬悚愧至將來興舉大工當此經費支絀之會必須設法補苴臣另有條議容俟續陳現將一切應辦事宜謹會同撫臣和果認真妥協籌辦汛期正長上游兩岸工程尤應督飭小心防範不敢疎忽再此次漫口疎防之專管中河通判王葵初協備張廣業並防守之中牟下汛縣丞張世惠把總辛得成均請旨卽行革職兼轄之中牟縣知縣高均照例交部議處其開歸道福敏雖到任僅止半月究有兼轄之責仍請交部議處至兼轄之開封府知府鄒鳴鶴先經撫臣鄂順安奏明責令專管城工未能出省兼顧協防應請免其議處

中牟大工委稿 乙巳（七月初四日）諭慧成奏中河廳九堡隄頂過水奪溜南趨摺據稱本年六月沁黃盛漲大溜湧注將中牟下汛八堡新埽先後全行蟄塌趕卽集料搶補甫廂出水溜急下卸至九堡無工之處正值風雨大作鼓溜南擊浪高隄頂數尺人力難施隄身頓時過水全溜南趨口門塌寬一百餘丈等語着該

河督督飭道廳營汛各員趕緊籌辦盤做裹頭事宜毋得再有懈誤慧成身任河督未能先事豫防着交部嚴加議處鄂順安兼轄河務亦着交部議處疎防之專管中河通判王葵初協備張廣業並防守之中牟下汛縣丞張世惠把總辛得成均着卽行革職兼轄之中牟縣知縣高均着交部議處開歸道福敏到任僅止半月開封府知府鄒鳴鶴現今專管城工惟均有兼轄之責各亦難辭着一併交部議處清宣宗實錄

是日河南巡撫鄂順安奏爲河水盛漲中河廳下汛九堡大隄過水隄身墊陷奪溜南趨事竊查本年六月以來黃流疊次盛漲二十一日又據陝州稟報萬錦灘長水五尺五寸並據黃沁廳稟報武陟縣沁河自初八日至二十一日共長水一丈五尺三寸沁黃同時並漲加以入伏之後連日大雨隄身處處着重屢次嚴飭該管道廳妥慎防護嗣據中河廳稟報中牟下汛九堡工程異常危險臣當卽帶領諮練員弁連夜馳往行至中途續據稟據報該處因對岸忽生灘嘴挺峙河心逼溜南趨冲刷壩先經開歸道福敏督搶堵工二十餘段藉資捍衛迨後大溜逼注新埽全行塌墊復經積料搶補甫廂出水偏值二十六日大雨一晝夜二十七日黎明加以東北風大作鼓溜衝擊浪過隄頂數尺兵夫不能立足有力難施九堡隄身頓時墊陷等情臣接閱之下不勝驚懼及至到工查勘大溜業已奪入由東南下趨口門場寬一百餘丈實係事起倉猝搶護無及河臣慧成亦隨即趕到臣因口門溜勢由東南下注雖距省城尙遠而漫水已漾至護城隄根誠恐水勢內逼當卽趕回省垣札調幹練員弁購料集夫設法妥爲防護以保無虞比次失事係在白日附近居民得以及時遷避損傷人口尙不甚多而民

田廬舍不無被淹臣督飭藩司多派委員攜帶饌餅蓆片錢文分赴被水各處僱船紮筏撫卹拯救一面查明水勢究由何處行走再行馳報仍俟水勢稍定會同河臣相度形勢確估工料籌劃錢糧另行奏明辦理

中奉大工奏稿

乙巳

(七月初四日)

諭軍機大臣等本日據慧成奏中河廳九堡隄頂過水

奪溜南趨一摺已有旨將慧成鄂順安分別嚴議議處矣現在該處口門既已塌寬一百餘丈而溜勢仍復南趨必須趕緊盤做裹頭着該河督督飭工員設法迅速辦理毋使口門再有續塌以至將來堵合倍難被淹災民卽着鄂順安飭司委員妥爲撫卹至下游既經漫口下游自必斷流將來興舉大工江南桃北口門已成乾岸自以現在豫省漫口爲重當此經費支絀之時該河督所稱另有條議之處究有何策足以設法補苴卽着迅速詳議具奏將此由四百里諭令知之

清宣宗實錄

是月初四日上諭前有旨令敬徵何汝霖赴南河查辦工程茲據慧成奏中河廳九堡隄頂過水奪溜南趨等語敬徵何汝霖毋庸前赴南河着卽折回馳驛前赴東河查勘所有隨帶司員着一併馳驛

中奉大工奏稿

是月乙巳(初四日)諭軍機大臣等本日據慧成奏中河廳九堡隄頂過水全溜奪入南趨口門塌寬一百餘丈已明降諭旨令敬徵何汝霖回東河查勘矣豫省上游既經漫口則江南桃北口門想必斷流南河現無要工可辦敬徵等接奉諭旨自必趕緊折回着於到工後將口門塌寬丈數及水由何處行走詳細查勘迅速具奏現計南河已撥經費自可改撥東河其餘應需銀兩仍着敬徵等約略計算先事預籌爲要慧成原摺抄給閱看將此由四百里諭令知之

清宣宗實錄

是月戊申（初七日）諭慧成着卽革職留河東河道總督之任鄂順安着加恩改爲革職留任中牟縣知縣高均着革職開歸陳許道福敏到任僅止半月開封府知府鄒鳴鶴現辦城工均着改爲革職留任清宣宗實錄

是月初九日慧成奏爲中河廳九堡口門現在籌款集料盤做裹頭並擬估攔黃壩及溜勢情形事竊臣具奏中河廳中牟下汛九堡漫口緣由於七月初八日承准廷寄恭奉上諭（上諭已載七月初一日慧成奏後）欽此臣跪讀之下感悚惶愧莫能名狀除將條議另摺陳奏外查中河口門因土性沙鬆兼之大汛河水盛漲之際溜勢洶湧如山是以刷寬二百餘丈大溜圈注東岸南趨現與撫臣籌款將西岸裹頭派員趕緊先行集料盤做東岸形勢容俟稍定亦卽趕緊免再行塌寬臣連日履灘確勘此次漫口奪溜極速正河受淤尙不甚厚臣本不諳習河務惟思汛期正長水漲靡定若長水漾入正河多受一分淤沙則多一分挑費必須估築攔黃壩業經派員趕緊估辦至溜勢現由東南下注其經過州縣並由安徽省何處歸宿於洪澤湖撫臣已委員確查另行具奏其省垣護城隄漫水漾至之處臣接准撫臣來咨刻卽親赴省城履勘先經撫臣調集河工地方員弁並撥運工次正雜料物及購辦輓塊防護周妥可保無虞被水災民並經撫臣分投派委幹員妥爲撫卹所有挑河築壩事宜恭候欽派大臣到工隨同確勘秋汛正長上游兩岸工程修守倍關緊要臣當督飭妥慎防範不任稍有懈怠並飭各道將下游各廳入伏前後搶廂埽段拋用輓石核實確查俟稟復到齊再行核奏再據報萬錦灘黃河於六月二十八日長水三尺五寸武陟沁河於六日二十五六並七月初二初三初五等日六次共長水

一丈二尺八寸 中奉大工奏稿 丁巳（七月十六日）諭據慧成奏中河廳九堡口門現在籌款集料盤築裏頭並擬估攔黃壩及溜勢情形一摺中河口門既已刷寬二百餘丈大溜圈注東岸南趨自應將西岸裏頭趕緊盤做至東岸形勢俟稍定後亦應趕築以免再行塌寬着敬徵等於到工後督飭在工文武員弁迅速集料趕築裏頭並飭將攔黃壩上緊估辦俾正河不致受淤現在秋汛正長水勢靡定該尙書等務當詳加履勘嚴飭工員等加意修守毋得再有疎虞至溜勢現由東南下注其經過州縣及由何處歸宿並着確查具奏 清宣宗實錄

是月辛亥（初十日）諭軍機大臣等本日據敬徵等奏折回東河查勘漫口一摺此次漫口現在塌寬究有若干丈尺所有盤做裏頭是否堅固敬徵等到工後卽着確查據實具奏至南河應辦事宜已有旨令潘錫恩體察情形次第興辦其五月所撥經費並已飭令該河督將未經解到者或飭令改撥或行咨東省截留已經解到者妥貯聽撥矣現在漫水究由何處行走被淹田廬當亦不少損傷人口究有若干昨已有旨令鄂順安飭司委員妥爲撫卹仍着敬徵等留心察看毋使一夫失所爲要將此諭令知之 清宣宗實錄

是月丁巳（十六日）修江蘇銅山蕭二縣天然閘下河堰從署總督壁昌請也 清宣宗實錄

是月十八日慧成奏爲沁黃水勢接續陡長節逾立秋上游兩岸各廳工程搶護平穩事竊照中河廳九堡口門籌款集料盤築裏頭並溜勢情形臣於七月初九日具奏後續據甘肅甯夏府呈報硤口黃河於七月初八至初十日共長水七尺四寸入硤口誌椿七字四刻跡陝州呈報萬錦灘黃河於七月

初三初五初七十三等日共長水十二丈二尺四寸黃沁廳呈報武陟沁河於初七十一十三等日四次共長水六尺一寸鞏縣呈報洛河於初二日長水二尺六寸非沁黃並漲即接續下注極爲猛驟上游南岸之上南廳北岸之黃沁廳均首受出水之水以致該二廳臨黃壩處處着險幸料物錢糧應手隨時督飭道廳搶辦平穩至本年沁河長水亦異常勤旺實爲多年所未有民隄無處不形險要北岸隄工攸關運道臣節經批飭河北道及黃沁廳不分畛域會同府縣晝夜竭力搶辦辰下始報穩定而汛期正長秋漲大小難知臣仍當督飭道廳實力修防不任稍有鬆懈其入伏前後各廳搶辦埽段已據各該道勘明段落具稟前來謹另片恭呈御覽至中河廳口門情形溜勢欽差大臣敬徵何汝霖業已到工現在查勘具奏所有應辦事宜臣惟有與撫臣竭盡血誠籌妥辦不敢怠忽中牟大工奏稿

是月己未（十八日）諭潘錫恩奏豫省南岸漫溢全黃注湖趕籌宣洩情形一摺至黃河現已斷流蕭工口門此時存水尙深自可暫緩堵合清宣宗實錄

是月十九日雷以誠奏爲南河要工亟應乘時酌辦以裨全河兼利運道而重帑項事臣恭閱邸抄東河漫溢中牟下汛九堡大溜南趨皇上派令南河勘工大臣折赴東河查辦惟辦公費在擇要治水必先下游現在東河漫決桃北上下斷流則楊工決口工程較易惟南趨大溜漸次灌注洪湖當此糧艘陸續回空南河各工有亟應擇要辦理者謹據考究並探訪所及臚列各條敬爲我皇上陳之 一中運河被冲緣隄河道亟應修復也查中運河由微山駱馬各湖之水導令口注直達楊莊運口中設雙金閘兼利鹽河自楊工漫口緣隄河道被黃水冲斷上年及本年空重漕船均係導洪湖之水倒漾灌

塘方始渡黃每灌一塘開壩既啓閉更番帆檣亦守候累日在在堪虞耗費實多現在中牟漫溢正河斷流運河前此被冲隄址河身漸次涸出自應趕緊修復如式庶回空糧船得以由清水銜尾南下無誤歸次受兌之期而鹽河亦資利濟 一清口宜乘時酌關也查清口以下至雲梯關外三百里河身挑工業於本月五日完竣原期引放湖水以資冲刷現在洪湖水盛加以上游黃水匯注勢更浩瀚若僅藉舊塘草閘涓涓細流不惟難收刷河之益且恐堰工喫重勢必又啓下游三河兩壩宣洩不及與宣洩太暢均屬可虞不止糜費一節也似應權其利害之輕重趁黃水未歸舊道趕緊酌關清口使清水得以暢出先收刷河實效俟中牟決口合龍黃歸舊道仍酌量啓閉使清水匯黃刷河濟運以復舊制 一楊工漫口正隄宜酌改復舊俾臻穩固也查該處漫口正隄原估在堵築合龍後再行補還今正河斷流無所用其堵築原估二百九十餘萬之帑自可全行節省則補還正隄不必稍存惜費之見查該處隄身除盤做裏頭外尙有一百七十餘丈之寬金門刷口又有四丈餘尺之深補還時須向內繞越圈築方可以保根脚穩實且須內外加幫戢隄並廂防風護壩包砌碎石庶黃歸故道可資捍衛工段既長尤須倍加堅實自應及早興工以免草率貽誤 一楊工漫口引河挑工宜酌改妥辦也查上年原估引河頭一千五百丈估費一百三十萬兩緣此處河流本靠北岸東注漫決後始直向北趨彼時勘估引河頭期於迎奪大溜堵築方易施工勢不能不於向南坐灣之老灘估挑一千五百丈使之斜向東北接入舊河今既無用堵築則此項錢糧亦可全行節省其挑工祇須按照舊河形勢確實估挑以順其性惟該處上下灘嘴仍須酌量挑切務期導引正溜歸入中泓不但新補正隄可免喫重

而該處迤下北岸埽工亦可化險爲平 以上四條均係目前最要之工而酌闢清口一節尤關河湖大局並連道生民至計應請旨勅下江南河督悉心熟籌確核辦理其應行節省之堵築楊工漫口及挑完引河頭原估帑銀四百餘萬兩即可備東河興辦大工之要需至楊工漫口以上徐州一帶河身必有淤墊埽工必有墊塌又埽前必有深塘對岸必有灘嘴當此人力易施之時如何挑挖淤墊如何廟做埽工如何仿照放淤之意抵銷積水用土填平深塘如何酌用逢灣取直之法挑切灘嘴引溜盡歸中泓又皆南河需要之工所當酌量妥辦者也夫南河之免堵決口由於東河中牟漫口之故則南河現在趕辦各要工實於東河大有裨益蓋下流既暢卽上游亦自順利理有固然宜不分畛域通盤籌劃商酌辦理應並請勅下東河督臣俟欽差大臣到工咨會查勘後一體妥辦南河殘卷

是月二十日欽差協辦大學士戶部尚書敬徵戶部右侍郎何汝霖奏爲查勘豫省中河廳九堡漫口大概情形事竊臣等於七月初八日率同司員等由山東齊河縣折回前赴東河十三日濮州途次恭奉批回前次奏摺並承准軍機大臣字寄道光二十三年七月初十日奉上諭本日據敬徵等奏折回東河查勘漫口一摺此次漫口現在場寬究有若干丈尺所有盤做裹頭是否堅固敬徵等到工後卽着確查據實具奏現在漫水究由何處行走被淹田廬當亦不少損傷人口究有若干昨已有旨令鄂順安飭司委員妥爲撫卹仍着敬徵等留心察看毋使一夫失所爲要等因欽此遵旨寄信前來臣等於七月十五日行抵東河北岸之廟工次日西行擬由祥河之十三堡迤下斷流之河陸行而南不料夜間長水漾入正河水深竟不能渡遂卽折回十七日復由廟工東行自蘭儀口渡河始達南岸十九

日卯刻馳抵中河廳九堡工次適河臣慧成先期在工督辦裏頭據稱中河廳土性沙鬆兼值大汛河水盛漲溜勢洶湧圈注南趨是以較前所奏又復刷寬等語臣等查詢得該廳九堡工程自道光二年久經淤閉本年入伏前後因上游坐灣逼溜南趨復值沁黃併漲二十六七日晝夜風雨大作浪高隄頂搶護不及以致失事尙屬實在情形委係無工處所現查口門寬三百六十餘丈中泓水深二丈八九尺不等東壩頭水深五尺五寸西壩頭水深五尺自十七日寅刻以後口門陸續落水丈餘微露灘唇溜勢稍爲平穩兩壩裏頭前因口寬難以運集物料是以暫緩查東壩裏頭已約齊五分西壩裏頭亦經運料查看水勢似尙不致再有塌墊惟甫交秋令汛期正長變遷長落日前均難預定當此制用孔亟之時兩河連年漫口堵築撫卹之費撥款甚繁自應將防守各員嚴行懲辦以警將來業據河臣將管河之道府暨廳營汛弁參奏遵旨分別革任俱屬咎所應得尙無遺漏該河臣慧成係在下游搶險趕赴無及自稱辜負聖恩其焦急惶愧之情難以言狀再查口門外溜勢八分由中牟以東祥符以西趨朱仙鎮東南行走因七月十六日口門長水間有漫過護城隄頂溜勢二分不甚喫重隨經撫臣鄂順安督同文武員弁搶護平穩現時水已漸落民情極爲安靜至黃水經過州縣被淹輕重臣等前在途次卽行飛咨河臣撫臣委員詳晰查勘妥辦茲據咨復漫口以後水由中牟祥符通許太康扶溝各等縣行走因白晝失事淹沒人口尙不甚多且附近地方業經撫臣飭司委派委員散給錢文贍餅以資口食並分給蓆片以爲棲止臣等行至南岸隨時細心察看每見災黎露處扶老攜幼其堪憫惻雖經撫臣立時賙卹臣等復面諭委員尤須加意撫綏認真賑給毋使一夫失所以仰慰皇上軫念

災黎之至意其漫水經由各州縣被災處所俟撫臣詳晰查明咨復後再行具奏至安徽被水各州縣漫淹成災情形業已移咨該撫臣自行詳查奏聞至此次漫口及東南兩河全局情形容臣等詳查成案悉心妥籌估計工需再行奏請恭候聖裁

中牟大工奏稿 乙丑（七月二十四日）

諭敬徵等奏查勘豫省中河廳九堡漫口大概情形一摺據查口門刷寬三百六十餘丈現查東壩裏頭已約齊五分西壩裏頭亦經運料察看水勢似不致再有塌墊等語該廳九堡漫口以後附近災民雖該撫立時賑卹而窮黎驟遭水患蕩析離居深堪憫惻仍着督飭委員加意撫綏覈實賑給毋令一夫失所至漫水經由各州縣被災處所並着確查具奏此次漫口該尚書等現在估計工需自應通盤籌劃悉心妥議當茲制用孔亟之時兩河連年漫口堵築撫卹之費需用甚繁務當力求撙節不可任聽工員濫估致滋浮冒

清宣宗實錄

是月辛酉（三十日）諭軍機大臣等程楙采奏黃河漫入皖界淝河水勢增長現飭查辦一摺豫省中牟漫口黃水下注現在皖省之淝河水勢陡長六尺雖未漫淹而來源正旺各河是否足資容納不致泛溢出槽所有穎鳳泗等屬下游州縣必應一律小心防護其太和縣與豫毗連上年河決祥符被淹最重此次中牟漫口該縣情形喫重何以尙無稟報着該撫迅即查明並黃流於何處入境何處停淤查探明確妥爲辦理將此諭令知之

清宣宗實錄

是月壬戌（三十一日）諭鄂順安奏省城保護無虞並拯救災民情形一摺此次黃水漫口下注省垣護城隄根將隄坡刷去四百餘丈當經加幫後餞鑲做埽段隄身一律高厚足資捍禦省城可保無虞等

語覽奏已悉惟秋汛方長仍須督飭員弁小心防守不可稍存大意其通許縣被水圍繞情形較重着該撫迅卽委員前往協同搶護務保無虞此外大溜經過地方及水歸何處仍着確切查明據實具奏被災地方妥爲撫卹無任失所清宣宗實錄

是月癸亥(二十二日)諭內閣前因河南中河廳漫口經吏部議奏河員處分朕因該河督等奏福敏到任僅止半月鄒鳴鶴現辦城工是以均改爲革職留任茲據給事中黃宗漢奏上年桃北廳漫口署淮海道沈鎬到任僅止十一日署淮安府知府曹聯桂有協防之責均經奉旨革職留工効力等語此次中河廳漫口事同一律自應照上屆處分辦理河南開歸陳許道福敏開封府知府鄒鳴鶴均着卽革職留於東河效力清宣宗實錄

是月二十六日慧成奏再於七月二十二日准欽差大臣敬徵何汝霖移咨承准廷寄恭奉上諭據慧成奏中河廳九堡口門現在籌款集料盤築裏頭並擬估攔黃壩及溜勢情形一摺(上諭已載七月初九日慧成奏後)欽此欽遵查中河九堡口門兩案裏頭本擬先盤西岸緣萬錦灘黃河於七月十三日已時報長水七尺五寸後續據陝州呈報十四日辰時至十五日寅刻復長水一丈三尺三寸前水尙未見消後水踵至計一日十時之間長水至二丈八寸之多浪若排山歷考成案未有長水如此猛驟是以口門因之刷寬而溜勢仍復圍注東岸不移誠恐再有續塌勢不容不先其所急當將裏頭趕緊盤築西岸裏頭亦已集料尅日趕辦現在長水雖則暢消秋汛尙長續漲靡定此後兩岸盤做裏頭並估築攔黃壩等工惟有隨同欽差大臣商酌籌辦不敢懈怠中奉太工奏稿

是月丁卯(二十六日)命刑部左侍郎成剛順天府尹李德馳往南河會同河道總督潘錫恩勘估工程清宣宗實錄

是日諭潘錫恩奏啓放橋壩宣洩湖水各情覽奏已悉所有漫水所經州縣情形輕重着卽探明繪圖貼說呈進其蕭工口門及中河綽隄前已有旨諭令該河督分別緩急次第籌辦着仍遵前旨妥爲辦理至所稱上游長河因水勢陡落不無淤墊而蕭工迤下已估未挑之工亦須改估大隄多有單薄卑矮之處均須分別挑築並鑲做禦水埽工堵閉洩水各壩曲盤籌計需費亦復不少現當經費支絀之際該河督務當激發天良一切覈實辦理毋任工員任意鋪張爲將來開銷地步現已派成剛李德到工會同該河督確勘應辦各工總須樽節估計俾帑項不至虛糜用紓朕宵旰憂廬之意方爲不負委任又據御史雷以誠奏上年原估引河頭一千五百丈估費一百三十餘萬兩現在漫口無用堵築此項錢糧可以全行節省其挑工祇須按照舊河形勢確實估挑該處上下灘嘴仍須挑切導行正溜歸入中泓等語是否可採並着該河督悉心熟籌酌量妥辦清宣宗實錄

是月戊辰(二十七日)諭鄂順安奏查明黃水經過地方及城根漫水現已消涸一摺此次漫口大溜下注所歷各州縣地方現經該撫查明比二十一年被水較寬災亦較重各該州縣自上次被災後元氣未復現在黃流經過情形復寬且重尤堪憫惻該撫現已飭司遴員分赴各地方妥爲拯濟仍着飭令該委員等認真撫卹毋使一夫失所用副朕軫念災黎之至意至省垣城根漫水雖已設法消落惟現當秋汛之時水勢靡常前次既有越過隄頂之事必須加意防護庶保無虞毋稍疎懈其陳留縣城垣

現被水圍甚急日來有無改道傍趨之處卽着迅速查明具奏 尋奏省垣城根水已消落惟南面隄尙有漫水俟全行消落一併堵築陳留縣缺口亦次第堵合節交白露可無妨礙 得旨上緊妥行辦理清宣宗實錄

閏七月初一日敬徵何汝霖奏爲查勘中河廳漫口東西兩壩裏頭估築攔黃土壩並急賑災黎情形事竊臣等於七月二十日將到工查勘中河廳九堡漫口壩寬三百六十餘丈水勢裏頭大概情形恭摺由驛具奏在案嗣於二十一日承准軍機大臣字寄道光二十三年七月十六日奉上諭據慧成奏中河廳九堡口門現在籌款集料盤築裏頭並擬估攔黃壩及溜勢情形一摺（上諭已載七月初九日慧成奏後）欽此遵旨寄信前來臣等遵卽分派隨帶司員輪赴口門查催東西兩壩裏頭並將應築攔黃土壩轉飭勘明丈尺段落督令趕辦臣敬徵臣何汝霖於二十七日親赴口門復加履勘現查口門溜勢較前平緩中泓水亦稍落東壩裏頭壩前水深一丈五尺正壩長八丈上寬一丈八尺下寬二丈四尺出水一丈一尺約已築有六成西壩裏頭因溜勢東趨露有嫩灘施工較易正壩現長八丈上寬二丈四尺下寬二丈八尺高水面一丈二尺約有三成仍嚴飭文武員弁趕緊加廂務使緊實可靠不致再有疏虞至所估攔黃土壩計長二百三十四丈共估土一萬三千八百餘方需銀三千五百八十九兩零分作十段亦飭令承辦各員層土層礮勒限完工嗣後卽續有長水正河方不致全行受淤再查河水經過州縣續據撫臣鄂順安咨稱中河漫口大溜係由中牟縣之東北向東南直趨歷祥符縣所屬之朱仙鎮及通許扶溝太康等縣入渦河下達安徽出境漫水泛至陽武尉氏陳留杞縣西華淮陽等